



## ACORDO PARA O IMPULSO DOS ORZAMENTOS 2020

Co ánimo de que o Concello da Coruña conte cuns orzamentos netamente progresistas en 2020, e tras varias semanas de diálogo leal e construtivo entre as dúas partes, os grupos municipais da **Marea Atlántica** e o **PSdeG-PSOE** adoptan o acordo que a seguir se detalla, que dá continuidade aos adoptados o pasado mes de xullo e que afectarán, non só ao presupuesto que se someta a consideración do Pleno da Corporación á maior brevidade posible, senón á súa execución e comunicación pública durante o ano vindeiro.

Trátase de impulsar un **orzamento expansivo**, que reforce tanto o **investimento** como o **gasto social** e que conteña a suba dos convenios nominativos en favor da **concorrencia competitiva**. Aínda que os compromisos que se asumen abranguen o conxunto das áreas de governo, a Marea Atlántica entende que os eixes prioritarios das políticas públicas do Concello da Coruña, en atención aos **principais desafíos da cidade**, deben ser:

**I.- Loita contra o cambio climático**

**II.- Benestar de proximidade e igualdade de xénero**

**III.- Mobilidade sostible**

**IV.- Dereito á vivenda**

**V.- Xustiza cos barrios**

A continuación, relaciónnanse as propostas da Marea Atlántica que estarán incluídas, con dotación suficiente para a súa execución inmediata, nos orzamentos municipais para 2020.

### I.- LOITA CONTRA O CAMBIO CLIMÁTICO

1.- En 2020, a través da empresa pública EMALCSA, que terá a consideración de medio propio do Concello da Coruña tras a celebración dunha xunta xeral en xaneiro, constituirase un **operador enerxético 100% municipal** segundo as liñas estratéxicas contidas no documento de bases aprobado por ambas partes o pasado 13 de decembro.

2.- Este operador será a **punta de lanza dun paquete de políticas públicas no ámbito da enerxía**, entre as que se incluirán en 2020, cando menos, as seguintes:



2.1.- A elaboración dun **Mapa das Enerxías Renovables**, financiado con fondos propios da compañía EMALCSA, que analice e planifique a curto, medio e longo prazo as capacidades de producción de enerxías renovables na cidade da Coruña.

2.2.- A creación dunha **Oficina da Enerxía** que dea apoio e asesoramento á veciñanza en cuestión enerxéticas: facturación, tarifas, bono social, aforro, autoconsumo, uso eficiente, rehabilitación, etc. Para a primeira fase da súa implementación contratarase unha asistencia técnica de 45.000 euros.

2.3.- A aposta pola **eficiencia enerxética** en vivendas e outros edificios, para o que, máis alá da implementación doutros proxectos integrais, se procurará incrementar o peso deste factor no deseño e valoración de axudas á rehabilitación.

2.4.- A elaboración dun **plan de formación ocupacional no sector da enerxía** como medida de impulso á economía verde, que procurará vincularse tamén aos proxectos municipais que se impulsen neste ámbito. Para a prospección previa, que dará forma á posterior posta en marcha do plan, reservaranse cando menos 20.000 euros.

3.- En 2020, o goberno municipal continuará co **Plan de Expansión do Arborado** en diversas zonas da cidade, a comezar por Durmideiras, e avanzará en paralelo cos dous Bosques da Coruña planificados e que contan con financiamento DUSI (290.000 euros): o **Bosque de Breogán** e o **Bosque das Cinco Illas**, nos Rosais.

4.- Tamén con financiamento DUSI se acometerán a **restauración do Río de Quintas** e o acondicionamento dunha senda fluvial; a rexeneración do **xardín de San Carlos** (400.000 euros) e a **ampliación da rede de hortas urbanas**, con melloras nas do Parque Carlos Casares de Monte Alto e a Agra do Orzán e novas instalacións en Palavea.

5.- O **Plan de Acción da Estratexia de Infraestrutura Verde** completarase en 2020, ao tempo que se actualiza a **Estratexia contra o Cambio Climático** e o seu correspondente plan de adaptación, para o que se reservan cando menos 17.000 euros no orzamento.

6.- Impulsarase, por último, a **compostaxe caseira e comunitaria** a traves do contrato de recollida de residuos sólidos urbanos, para o que se introduciron novas bonificacións na correspondente ordenanza fiscal.



## II.- BENESTAR DE PROXIMIDADE E IGUALDADE

### Educación

1.- En 2020 e nos anos sucesivos, o Concello da Coruña incrementará progresivamente o seu **gasto social** como tivo lugar durante os últimos anos de maneira sostida, mantendo a súa posición de **liderado nesta materia no conxunto das cidades galegas**.

2.- Tal e como a Marea Atlántica e o PSdeG-PSOE acordaron o pasado mes de xullo, **as escolas infantís municipais serán gratuítas a partir do curso 2020/2021**, tras a debida modificación do seu regulamento. Para isto, o orzamento municipal reservará cando menos unha partida de 490.000 euros para compensar a merma de ingresos.

3.- Encargaranse os proxectos para **dúas novas escolas infantís**, unha no Ofimático e outra, combinada con centro de día, entre Os Mallos e Vioño.

4.- Manterase, así mesmo, a dotación prevista en anos anteriores para **programas educativos** (370.000 euros) e **bolsas de estudos no estranxeiro** (650.000 euros).

5.- Dotarase con 800.000 euros a partida destinada ao financiamento de **obras en colexios e escolas infantís**, para impulsar en 2020, con carácter plurianual, intervencións pendentes no CEIP María Pita, o CEIP Raquel Camacho, o CEIP Sanjurjo de Carricarte, o CEIP San Francisco Xavier e a EIM Os Cativos, entre outros centros. Así mesmo, o exitoso **programa participativo “O noso patio”**, desenvolvido no CEIP Sanjurjo de Carricarte, terá continuidade o ano vindeiro cunha dotación de 60.000 euros.

### Desigualdade e dependencia

1.- En 2020 manterase a consignación para o programa de comida a domicilio (540.000 euros) crearse un **novo servizo de lavandería a domicilio** para persoas maiores de 80 anos, dotado na súa fase inicial con 120.000 euros, o que se estima que permitirá chegar a unhas 200 persoas beneficiarias.

2.- Ampliarase así mesmo o **Servizo de Axuda no Fogar (SAF)** cun **novo contrato, dotado con 600.000 euros**, para chegar a 160 persoas máis, e daráselle continuidade ao programa **Redeiras** para combater a soledade non desexada.

3.- Aínda que o crédito poderá ser ampliado máis adiante, en caso de ser necesario, tanto a **Renda Social Municipal (RSM), con 1,3 millóns**, como as **Axudas de Emerxencia Social (AES), con 1,1 millóns**, verán incrementada a súa dotación en 2020.



4.- Nos **centros cívicos**, ademais de manter os fondos previstos en anos anteriores para actividades socioculturais, en torno a un millón de euros, consignaranse 450.000 euros para acometer, con carácter plurianual, **obras de mellora nas instalacións de Elviña, Os Rosais e A Silva, onde tamén se reurbanizará a contorna exterior** con cargo aos contratos de mantemento do espazo público.

5.- Malia ao peche do **Centro Abeiro** de baixa esixencia, prorrogarase o contrato do servizo de atención a persoas sen fogar e impulsarase a construción dun **novo equipamento** destas características, para o que se dispón de financiamento DUSI. Ademais, destinaranse 20.000 euros á elaboración dun plan municipal contra o senfogarismo.

6.- Por último, ampliarase de 20.000 a 30.000 euros a previsión orzamentaria para o programa de **Educación na Rúa**.

#### Igualdade de xénero

1.- O investimento en **políticas de igualdade de xénero** medrará nos vindeiros exercicios até acadar ao final do mandato, **en 2023, o 1% do orzamento total** do Concello da Coruña.

2.- Impulsarase a creación, na Casa da Veeduría, na Cidade Vella, da **Casa das Mulleres “Marcela e Elisa”**, onde se concentrarán servizos e recursos nesta materia. O orzamento incluirá a dotación necesaria para a redacción do proxecto de rehabilitación e ocupación do edificio, así como 50.000 euros para a **Escola de Empoderamento Feminista**, que terá alí a súa sede.

3.- En 2020 crearase tamén o **Observatorio da Igualdade**, dotado con 432.000 euros dos fondos FEDER correspondentes ao plan DUSI, manterase a dotación de 150.000 euros para **subvencións en concorrencia competitiva e ampliarase o servizo de canguraxe**, cun incremento de 20.000 na partida correspondente.

4.- Por último, reforzaránse tanto o **Centro de Orientación Familiar (COF)**, cunha nova traballadora social, como a **Unidade de Asesoramento ás Migracións (UAMI)**, con 40.000 euros adicionais no seu orzamento.



### III.- MOBILIDADE SOSTIBLE

1.- En 2020 impulsarase a **reforma global do mapa das liñas do autobús urbano**, co obxectivo de **aumentar as frecuencias** nos barrios peor comunicados hoxe, así como nos principais nodos de actividade diaria na cidade. Implantarase unha **nova liña con marcado carácter metropolitano** que conecte as vías de entrada na cidade coas estacións de autobuses e tren, o polígono de Agrela e o centro comercial Marineda. Fomentarase a cultura do **transbordo** e mellorarase a conectividade dos **centros hospitalarios e de saúde** con paradas, liñas e frecuencias. O horario do **bus nocturno** ampliarase na fin de semana e acondicionaranse as paradas do bus urbano para que sexan accesibles e máis confortables e operativas e revisión da concesión das **marquesiñas**.

2.- Poranxe en marcha **novas tarifas reducidas para menores de 26 e maiores de 65 anos** do bus urbano, tal e como consta nos acordos de xullo, e estudarase a implantación dunha tarxeta **Millenium Sen Barreiras para persoas en situación de vulnerabilidade e con diversidades funcionais**.

3.- Ademais de executar os **novos carrís bici de Pardo de Cela e Puga y Parga e o metropolitano da nova glorieta de San Diego**, actuacións xa proxectadas, continuarase coa ampliación da rede ciclable e o reforzamento de **Bicicoruña** coa introdución da **bici eléctrica** e a instalación de **27 novas estacións**, seguindo sempre criterios de equilibrio territorial para dar cobertura a todos os barrios.

4.- Incrementaranse en 10.000 euros os fondos destinados á **modernización do servizo de taxi** (combustibles alternativos, vehículos adaptados, etc).

5.- Apostarase por unha **cidade camiñable** co redeseño de vías, prazas, parques e rotondas, de maneira que se acurten camiños e minimicen os rodeos.

### IV.- DEREITO Á VIVENDA

1.- En 2020, tal e como figura nos acordos de xullo, poranxe en marcha unha **bolsa de vivenda en aluguer para colectivos con dificultades de acceso** a través da Empresa Municipal de Vivenda (EMVSA). Farase a partir do regulamento elaborado no pasado mes de abril e implementarase, neste primeiro ano, cunha partida de **450.000 euros**.

2.- Daráselle un novo impulso á **rehabilitación de vivenda** e ás mellores en eficiencia enerxética, diversificando o obxecto das **convocatorias de axudas** e as formas de acompañamento da administración. Novas convocatorias de subvencións á rehabilitación



con fondos municipais e desenvolvemento das Áreas de Rehabilitación Integral (ARI) e de Áreas de Rexeneración e Renovación Urbanas (ARRU), entre elas as do Grupo María Pita, para o que se reservarán **1,2 e 1,45 millóns de euros** respectivamente.

3.- Impulsarase a **construción de vivendas de aluguer social** en distintos ámbitos, entre eles os das parcelas municipais de **Marqués de Pontejos, Panadeiras e Ofimático**, e daráselle continuidade ao **Plan de Acceso a un Hábitat Digno** para os asentamentos precarios.

#### V.- XUSTIZA COS BARRIOS

Co obxectivo de que o investimento do Concello da Coruña teña un reparto xusto no territorio, saldando a débeda histórica da cidade cos seus barrios, acórdase:

1.- En **Durmideiras**, executarase a rehabilitación do mercado municipal (1,2 millóns) e o proxecto de accesibilidade á praia de San Amaro, que conta con financiamento DUSI.

2.- En **Monte Alto e As Atochas**, executarase a rehabilitación da praza e o mercado de Monte Alto (4 millóns), continuarase co proxecto do Camiño do Vixía no cruzamento entre Vereda do Polvorín e Santo Tomás (300.000 euros) e abordarase a rehabilitación da Bágoa de San Roque (450.000 euros), canda o Campo da Leña.

3.- Na **Cidade Vella**, daráselle continuidade ao plan de revitalización coa execución das obras de reurbanización de Cortaduria, Damas e Rosario, así como a segunda fase da rúa Maestranza e a contorna da sede da Fundación Luís Seoane (3,3 millóns). Equiparanse, así mesmo, as Naves do Metrosidero, cun investimento de 370.000 euros, e encargarase o proxecto para a ampliación do complexo nunha segunda fase (60.000 euros).

4.- No **Orzán e a Pescaría**, impulsarase a reurbanización de Panadeiras e a contorna de San Agustín coa conexión entre os dous ámbitos, para o que se reservarán fondos suficientes para a adquisición do edificio do Arcebispado de Oviedo e para a redacción dos distintos proxectos (180.000 euros). Tamén se encargará a elaboración do proxecto para a reurbanización dos Cantóns e a apertura do porto á cidade.

5.- No **Ensanche, a Praza de Pontevedra, o Parque de Santa Margarida e As Pontes**, executarase a demolición do viaduto da Rolda de Nelle e a reurbanización da contorna (1,2 millóns de euros). Encargarase, así mesmo, o proxecto para a reurbanización da rúa Pintor Joaquín Vaamonde (320.000 euros).



6.- Na **Cidade Escolar, Labañou** e as **Vivendas María Pita**, habilitarase unha área multideporte e un parque biosaudable a carón do parque infantil da Praza da Tolerancia, reabilitarase o hórreo de San Roque e encargarse o proxecto para prolongar o carril bici de Paseo de Ronda a Gregorio Hernández, conectándoo coa Rolda de Nelle. Así mesmo, acometerase a reurbanización do espazo público do grupo de vivendas de María Pita.

7.- Nos **Rosais**, ademais da mellora do centro cívico, executarase o Bosque das Cinco Illas e a reurbanización do Camiño do Cura, para a que se tramita a correspondente modificación do planeamento.

8.- Na **Agra do Orzán**, que se beneficiará tamén da demolición do viaduto da Rolda de Nelle, abordarase a remodelación da Praza das Conchiñas e encargaránse proxectos para a reurbanización da rúa Pascual Veiga e a rehabilitación do Muíño da Gramela.

9.- No **Ventorillo e A Silva**, executarase a glorieta en Alcalde Jaime Hervada, na intersección co acceso á Silva, e remodelarase o Centro Cívico da Silva, tanto no interior como no exterior da parcela (450.000 euros).

10.- Na **Sagrada Familia**, daráselle continuidade ao proxecto de ampliación da biblioteca nos locais anexos (proxecto Eiralab), executarase a renovación da rúa Río Ulla e acometeranse melloras na Praza da Igrexa de San Rosendo.

11.- Nos **Mallos**, encargarase un proxecto para unha nova escola infantil, combinada con centro de día, e executaranse as obras na Avenida do Ferrocarril correspondentes aos accesos á nova estación intermodal. Así mesmo, reurbanizaranse as rúas Puga y Parga e Pardo de Cela, que contarán con cadanxeus carrís bici.

12.- En **Catro Camiños e San Pedro de Mezonzo** habilitarase unha pista de skate baixo o viaduto e rehabilitarse o pavillón do Remanso.

13.- No **Castrillón** executarase, a través da empresa pública EMVSA, a obra do complexo deportivo, para dotalo de piscina e outros recursos. Ademais, encargarase o proxecto para a urbanización do espazo libre adquirido polo Concello no interior da mazá de José María Hernansáez, mellorarase a mobilidade e accesibilidade entre o centro de saúde e escola infantil Carricanta e redactarase o proxecto para a reurbanización de Rafael Bárez.

14.- En **Eirís**, executarase o novo campo de fútbol (1,6 millóns), encargarase un proxecto para a rexeneración do núcleo de Eirís de Abaixo e abordaranse tanto o saneamento do Foxo como a apertura da rúa Terranova de Eirís na súa conexión coa Avenida.



15.- No **Ofimático** impulsarase a urbanización do resto do barrio ao tempo que se procura unha solución para os afectados e as afectadas de San Vicente de Elviña a través dunha mesa de diálogo na que estarán representados tanto o goberno municipal como a Marea Atlántica. Ademais, encargarase un proxecto para a construcción dunha escola infantil, executarse o viario de Santa Teresa de Jornet (287.000 euros) e rehabilitarase a Fonte dos Caños.

16.- En **Matogrande**, acondicionarase como zona de lecer da parcela que acollía a planta de GLC, que o PXOM cualifica como espazo libre.

17.- No **Barrio das Flores** redactarase o Plan Director do barrio e acometerase unha nova fase de melloras na urbanización da praza central.

18.- En **Monelos e Elviña** acometerase a mellora do aparcadoiro da Praza Isaac Díaz Pardo (242.000 euros) e a rehabilitación do edificio García Sabell, con financiamento DUSI.

19.- En **Novo Mesoiro** encargarase un estudo para dotar dunha estrutura pública cuberta a zona verde e reorganizar as áreas de xogo para posibilitar o uso de todas as idades.

20.- En **Oza, A Gaiteira e Os Castros**, redactarase un proxecto para instalar pérgolas nos parques de San Diego, Oza e Parque Europa, encargarase outro para as beirarrúas entre Casablanca e o centro de saúde de Monte das Moas, melloraranse as da rúa Montes e San Diego e tamén se contrararán os proxectos para reurbanizar as rúas Carballo e González Chas.

21.- En **Palavea** abordarase a restauración do Río de Quintas, implantaranse hortas urbanas, instalaranse paneis informativos nas paradas de autobús e consignaranse os recursos necesarios para manter aberto e a punto o centro deportivo da Fábrica de Armas.

22.- Na **Zapateira** acometeranse as obras de saneamento separativo nas rúas Burdeos (177.000 euros), Venecia (256.000 euros) e Helsinki (139.000 euros).

23.- En **Bens**, executaranse obras de reposición do firme e melloras de seguridade na estrada e na área de xogo infantil.

24.- No **Campanario**, mellorarase o firme na praza central e instalaranse lombos de seguridade.

25.- En **Feáns** reurbanizarase o Camiño de Campos, abordaranse obras de mellora e ampliación do centro cívico e comezarase a execución do Bosque de Breogán.



26.- En **Nostián** abordarase unha nova fase de reurbanización e instalación de saneamento separativo.

27.- En **Mesoiro Vello**, mellorarase a zona de lecer.

28.- En **San Pedro de Visma** habilitarase unha zona área multideporte canda o Parque Adolfo Suárez, melloraranse as beirarrúas e a accesibilidade na rúa San Pedro de Visma e construirase unha rotonda no cruzamento coa estrada provincial DP-3003.

## VI.- OUTRAS MEDIDAS E ÁREAS

1.- No que respecta á **Participación Cidadá**, acórdase a **continuidade do programa dos Orzamentos Participativos**, dotados con **2,5 millóns**, e a inclusión nos presupostos de 2020 de todos os proxectos pendentes de execución. Así mesmo, manteranse os **usos previstos no pavillón do Remanso**, en Catro Camiños.

2.- En canto a **Mocidade**, terán consignación suficiente os contratos precisos para que as **Naves do Metrosidero** estean completamente equipadas e dispostas para os usos e o modelo de xestión previstos. Manteranse, ademais, os **programas vixentes** na área e daráselle impulso ao novo contrato do **Centro Municipal de Información Xuvenil (CMIX)**.

3.- En **Deportes**, acometerase a renovación do **rocódromo de Riazor**, consignando en 2020 a meirande parte do orzamento total (270.000 euros) da obra. Ademais, abordarase a renovación integral dos **campos 2 e 5 da Torre**, adaptándoo á práctica do **rugby**.

4.- En **Innovación Tecnolóxica**, recortarase o gasto en software privativo para promocionar o **software libre** e manterase a **plataforma Cónsul**.

5.- En **Emprego**, crearase un **novo Plan Municipal de Emprego (2020-2023)**, ao que se destinarán 20.000 euros e un **Observatorio de Emprego** (60.000 euros), ademais de encargar todos os traballos que sexa precisos para o impulso da **Cidade das TIC**, non só como un parque tecnolóxico, senón coma un novo barrio con espazo público, dotacións e equipamentos de cidade e de barrio.

6.- En **Mercados** impulsarase unha **nova ordenanza** e encargarase unha **guía turística** dos mercados municipais (20.000 euros).



7.- En canto á **Acción Exterior**, implementarase o plan de acción das Bases de Acción Exterior (BAEX) da Coruña.

8.- Polo que respecta á **Axenda Urbana Coruña Próxima 2030**, finalizarase a fase de diagnóstico e abrirase ao conxunto da Corporación a elaboración do seu plan de acción.

9.- En **Cultura**, manteranse as **liñas de axudas**, redactarase o proxecto para **dotar o barrio de Novo Mesoiro dunha biblioteca** (20.000 euros), incrementaranse os recursos destinados a edicións e exposicións e asegurarase a **continuidade do Festival Noroeste**, mantendo tanto o investimento como o formato e dotándoo dunha **dirección artística escollida, de acordo co sector, a través dun concurso público**. Reservaranse tamén os recursos necesarios para iniciar as obras de **acondicionamento da Fundación Seoane** (800.000 euros) que aseguren a conservación do **legado do artista**.

10.- En **Memoria Histórica**, dotarase a nova área con 110.000 euros e asúmese o compromiso de que o orzamento acumulado ao remate do mandato non sexa inferior aos 450.000 euros.

11.- En materia de **Medio Ambiente**, insistirase na retirada de **especies invasoras**, manterase a dotación para **colonias felinas** (30.000 euros) e acometerase a **mellora do saneamento no colector de San Roque** (471.000 euros).

## EXECUCIÓN E SEGUIMENTO

En virtude destes acordos, que permitirán a aprobación dos Orzamentos 2020 do Concello da Coruña, o **gobierno municipal do PSdeG-PSOE e o grupo municipal da Marea Atlántica comprométense a colaborar e visibilizar esta colaboración durante a execución dos proxectos e a implementación das políticas públicas anteditas**.

A **comisión de seguimento** dos acordos subscritos por ambas partes en xullo de 2019, que se reúne con carácter bimestral, encargarase en diante tamén de que o conxunto destes acordos se cumpra en forma e prazo.

Na Coruña, a 23 de decembro de 2019

José Manuel Lage Tuñas  
Voceiro do GM do PSdeG-PSOE

María García Gómez  
Voceira do GM da Marea Atlántica